

Bragoro

Akanfoɔ wɔ amammerɛ bi a woyɔ ma wɔn mmaayewa a woaduru wɔn mpanin afeɛ so, de pagya wɔn firi mmɔfra mu ba mpanyimfoɔ mu. Saa amammerɛ yi ne bragoo.

Mmaayewa a wɔayɛ bra na yɛgoro wɔn bra. Sɛ abaayewaa bi yɛ bra a, yɛtumi ka sɛ:

- i. Wakyima
- ii. wakɔ afikyire
- iii. wabu ne nsa
- iv. wakum Esono
- v. wahunu mogya anim

Bragoro botaeɛ:

1. Yɛde hyɛ abaayewaa no animuonyam sɛ watumi ahwɛ ne ho so yie abɛduru ne mpanin afeɛ so, a wankɔfa mperewa nyinsɛn.
2. Yɛde hyɛ ɔbrafoɔ anaa abaayewa no awofoo animuonyam sɛ wɔatumi atete wɔn ba no yie.
3. Yɛde da ɔbrafoɔ no adi kyerɛ amansan sɛ, afei deɛ wanyini enti sɛ ɔbarima bi ani gye ne ho a ɔtumi kɔyɔ ne ho adeɛ ware no.
4. Eyɛ afotuo, adesuedeɛ ne nhwɛso pa ma mmayewa nketewa a wɔwɔ akyire no.
5. Yɛde bɔ ɔbrafoɔ no dwetire - sɛ yɛgoro no bra saa a, nkurofoɔ kyɛ no sika ne nnoɔma.

Bragoro gu ahoroo ano mmienu.

- i. Deɛ yɛka ɔbrafoɔ no ano kɛkɛ wɔ
- ii. Deɛ yɛhyɛ da goro no wɔ abɔntene ma obiara hunu

Sɛ abaabewa bi yɛ bra a, ɔka kyerɛ ne maame, na ne maame ne ne papa nso aboaboa wɔn ho. Nnoɔma a ɛhia ne:

- Nnuane: borodeɛ mankani, bayerɛ, bankye.

- Nam: hanam mpunam, nsuonam, akokɔnam, ne ade.
- Atosodeɛ: ntoosi, gyeene, mako ne ade.
- Adwareɛ ho nnooma: sapɔ, mpopaho, akenkaatwadeɛ, paada.
- Ahyehyɛdeɛ: ntoma fufuo (fitaa) kente, sika, asonkawa, sikakɔmuadeɛ, mpaninnhwenneɛ, ahenemma (mpaboa).
- Nnooma a ɛkaka ho: nkosua, ɛsonowedeɛ, nkurumakɛsɛ, asɛsɛdwa, yawaa, nsommɛ ne adwera ne ade.

(Sɛ ɔbarima bi asi ɔbrafoɔ no asiwa a, ɔno na ɔtoto saa nnooma no ma yɛde goro ne yere bra. Sɛ yɛnsii no asiwa de a, ɛyɛ ne papa asɛdeɛ sɛ ɔtoto nnooma no).

Bragoro no ankasa:

- Sɛ abaayewa no bɔ ne maame amanneɛ sɛ wayɛ bra a, ɔmaame no kɔbɔ ɔhemmaa anaa ɔbaapanin a ɔwɔ kurom ho amanneɛ. (ɔhemmaa no nko ara na ɔwɔ kwan ma yɛgoro abaayewa bi bra).
- ɔhemmaa soma ma yɛkɔfa abaayewa no ba ma ɔhwɛ no yie sɛ ɔnni kan nyinsɛneeɛ.
- Sɛ nyinsɛn biara nni ho, ɔma kwan sɛ yɛngoro no.
- Da a yɛrebɛgoro bra no anɔpa tutuutu, ɔbrafoɔ no maame de anigyeɛ bɔ asɔ mu de kyin borɔno no so sɛ:

“Osee ee, yee

Nana Ama ayɛ braa o!”

- Nnipa a ɛbɛn ho te a, wɔdi kan ba bɛma ɔbrafoɔ no tirinkwa, san kɔ wɔn fie kɔsiesie wɔn ho ba bragoro no ase.